

Na periclitadas, ma sün megladra via da gnir

La populaziun da la randulina da chesa e da la randulina da pensa es pü u main restada stabila i'ls ultims 20 ans in Svizra. Ma a partir dal 1990 es gnieu observo ün trend negativ. Perque sun quistas duos spezchas da «l'utschè da las Engiadinais e dals Engiadinais» classificadas scu potenzielmaing periclitadas. Cun pü poch spazi da viver e'l müdamaint dal clima, sun quistas sorts da randulinas güst confruntadas cun duos sfidas provochantas.

MARTIN CAMICHEL/FMR

Bainbod bandunan las randulinas darcho l'Engiadina e la Val Müstair e's mettan a partir da la mited d'october in viedi in direczion da climas pü agreabels. Fin la mited marz restane in lur refügi d'inviern e zieva as mettane darcho in viedi vers nord. Quantas chi tuornan propi darcho illas vals ost-alpinas grischunas – e cu cha la populaziun da las randulinas s'ho sviluppeda in Engiadina e la Val Müstair i'ls ultims ans – nun es però taunt cuntschaint. «Da der üna survista davart la populaziun da las randulinas in singulas regiuns nun es pussibel causa variaziuns in pitschens territoris», disch Livio Rey, ornitolog tar la Staziun ornitologica svizra da Sempach.

Da la randulina, chi vela scu il simbol u la bes-cha da las Engiadinais e dals Engiadinais, s'observa que trais spezchas in Engiadina e la Val Müstair. Que es la randulina da pensa (tud. Mehlschwalbe), la randulina da chesa (tud. Rauchschnalbe) e la randulina da crap (tud. Felsenschwalbe) chi'd es pü rera in quistas regiuns. Da las prümas duos spezchas do que in Svizra var 70 000 fin 90 000 pèrins – üna cifra chi'd es restada magari stabila i'ls ultims 20 ans. Ma in conguel cun ils ans 1990 s'observa tenor l'ornitolog ün trend negativ. Tar la randulina da chesa s'ho diminuida la populaziun per var 10% fin 20% in conguel cun ils ans 1993–1996, tar quella da pensa nu s'ho üngünas cifras precisas.

Distanzas enormas

«Sch'eu füss üna randulina e sch'eu savess svuler...», uschè il cumanzamaint da la famosa chanzun engiadinaisa chi brama la liberted da savair svuler cha quistas bes-chas haun. Per ünguotta nu vain fat adöver da quist exaimpel illa chanzun, siand cha las randulinas svoulan fich bain e per «ir in vacanza» sur inviern faune grands tragets. «La randulina da chesa vo fin in Africa, fin in regiuns pü al süd cu la Sahara. Que s'ho chatto rinchs da randulinas, chi sun



La randulina da pensa es classificada scu sort da prioritad, las que-las vegnan promossas cun diversas imsüras.

FOTO SOMEDIA

gnidas markedas in Svizra, fin in l'Africa dal vest. Üna cha s'ho marco i'ls ans 1970 in Africa dal Süd s'ho zieva dafatta registro in Svizra», declera Livio Rey. Davart la randulina da pensa la nu s'ho tenor l'ornitolog fin hoz na üngüns chats svizzers, chi sün pü al süd cu la Sahara. Uschè as po tenor el bainschi observer d'inviern las randulinas da pensa in l'Africa dal Süd, ma que nu's so propi d'inuonder ch'ellas derivan. In connex cul müdamaint dal clima nun es tenor l'ornitolog fin uossa gnieu observo cha las randulins bandunessan marcantamaing pü bod u turnessan pü tard in Svizra.

Insects e temperaturas bassas

Sun las randulinas a partir da la mited marz darcho inavous in Svizra, haun ellas da pisserer per lur generaziun giuvna. Schi sun però cunfruntadas in lur soggiorn da sted cun noschas circunstanças climaticas, resultan diversas sfidas per quists utschels. «Siand cha randulinas as nudreschan surtuot d'insects chi svoulan, sun quels tar trid'ora ubain main activs u già morts. Que renda pü difficil a chatter pevel e que periclitatescha fermamaing als giuvens», declera Livio Rey. Uschè s'ho güsta ultimamaing – zieva las strasoras da la fin d'avuost 2023 – chatto illa Val dal Rain grischuna diversas randulinas peridas, chi

sun trapassadas causa precis quist motiv. La giazetta Südosstschweiz vaiva rapporto in lündeschdi passo.

Lotiers haun las randulinas da s-chuder lur generaziun giuvna pü suvenz tar temperaturas bassas e que las impedischa impü dad ir in tschercha da pevel, uschè l'ornitolog. In connex cul müdamaint dal clima sun impustüt cundiziuns meteorologicas – chi sun hozindü d'uraunt ün lung temp listessas – la granda problematica.

Prosmamaing periclitadas

Sper il müdamaint dal clima ho eir l'umaun ün'influenza süllas randulinas cun desdrüer pass per pass lur spazi da viver. «La randulina da chesa es gügent intuorn bes-chas e stallas, inua ch'ella fo sieu gnieu. La randulina da pensa as chatta pütost in cumüns e citeds – ma lo mauncha la toleranza invers ellas», declera Livio Rey.

Uschè desdrüa l'umaun quel spazi da viver cun piglier davent ils gnueus, chi inasceschan fatschedas, u cun renover stallas, crapendas e chesas veglias. Tenor l'ornitolog es per la randulina da chesa surtuot l'agricultura intensiva ün problem. «La consequenza es cha la randulina nu riva pü da's chaser aint. Perque es la randulina da chesa e quella da pensa part d'üna lista da prüma adunaziun, chi las categorisescha scu prosmamaing periclitadas», disch Livio Rey. El agiundscha cha la randulina da pensa saja dafatta classificada scu sort da prioritad, las que-las vegnan promossas cun diversas imsüras. Üna da quellas es da metter a dispuziun als utschels plazzas da cuvir adattadas, dimena da monter gnueus.

La randulina da crap – chi'd es pü rera in Engiadina e la Val Müstair – nun es periclitada, siand ch'ella nun es dependainta da l'umaun. Ella po eir fer sieus gnueus vi dad edifizis, ma impustüt eir illa gripa. Lotiers nu bandun'la pü uschè suvenz la Svizra causa il müdamaint dal clima – uschè chi vain dafatta observo ün trend positiv a regard la populaziun.

VALCHAVA

Linard Bardill

preschainta seis nouv cudesch



Linard Bardill cun seis nouv cudesch.

FOTO CLAUDIA CADRUVI

In gövgia, ils 21 da settember a las 20.30 preschainta Linard Bardill in Chasa Jaura a Valchava seis nouv cudesch da poesias «Terra pels peis – Den Füssen ein Grund». In quistas poesias giouva el, sco cha la Chasa Editura Rumantscha scriva, cun tuot ils elemaints – la terra, l'ajer, la natüra, il temp ed il spazi. «L'autur ans lascha ralentar e drizza seis sguard sün l'essenzial. E perquai cha Linard Bardill es adüna eir ün grond narratur e chantatur, raquinta sia lingua istorgias, s-chaffischa purtrets ed es ludica e familiara.» Per l'accompagnamaint musical procurarà Linard Bardill svessa. La sairada vain moderada dad Anita Capaul. (cdm/fmr)

Prelecziun cun musica, rumantsch e tudais-ch: Chasa Jaura, Valchava, gövgia, ils 21 da settember 2023 a las 20.30. Entrada libra cun maisa da cudeschs ed aperitiv.

insertat



Dapli intervegnis Vus en nossa brochura davart legats

per persunas cun handicap

procap

Procap Grischun
Tel. 081 253 07 07
www.procapgrischun.ch

EDITORIAL

Dar la pussibilità da cuntinuar

Las votantas ed ils votants da Scuol han il pled in chapitel a regard il proget per ün grond implant fotovoltaic i'ls contuorns da Sur Bos-cha. Cun ün cler SCHI as muossa fiduzcha invers la suprastanza nouva ed as pussibiltatescha da cuntinuar a sclerir ils detagls.

NICOLA BASS/PL

I cumün da Scuol voul profitar insembel cul cumün da vaschins Scuol, l'Energia Engiadina e las Ouvras Electricas d'Engiadina SA da la strategia d'energia federala, l'uschedit «Solar Express», chi pussibiltatescha la realisaziun d'implants solars otalpins cun sustegnns finanzials da fin 60% dals cuosts d'investiziun. Perquai dess gnir realisà ün grond implant fotovoltaic a Sur Bos-cha i'l territori da skis Motta Naluns. Cun quist proget dess gnir realisà sün üna surfatscha maximala da 77 hectaras ün implant fotovoltaic chi produia energia solara per var 20 000 chasadas. Ils iniziants fan quint cun investiziuns da 100 milliuns francs.

La radunanza da la cumünanza da vaschins ha acconsenti al

contrat da dret da fabrica in gövgia passada cun 70 cunter 25 vuschs. In dumengia chi vain decidan las votantas ed ils votants da Scuol a l'urna a regard la tematica. Pro ün SCHI das-chaun ils iniziants ed ils partenaris da la società Scuol Solar cuntinuar cun sclerir ils detagls e preparar la dumonda da fabrica correspundenta.

Naturalmaing daja argumaints per e cunter quist proget. Dess quel propcha esser uschè grond? Es l'indemnisaziun per exaimpel our dal fit da dret da fabrica minimal adequat? Dess il cumün as partecipar sco acziunari a la società ScuolSolar? Ed as vögla insomma laschar metter suot squitsch da temp da quist express solar? Bleras dumondas stuvaran pür gnir scleridas d'uraunt il process. Eir il perimenter dal proget starà gnir adattà

cur cha'l rapport davart l'examinaziun ecologica es avantman. Ils responsabels han fat fingià üna gronda e seriusa lavur, blers detagls stuvaran pür amo gnir sclerits.

Puchà, cha la vardà vain tutta pro l'opposiziun main seriusa. Ils critikers tiran a nüz be las cifras chi tils van per staila. Las emeziuns paran dad esser il pan da las discussiuns illas medias socialas. Ma da congualar uossa cullas activitats da la Lia Naira cunter las ouvas electricas in Engiadina e da giavüschar uossa da las Engiadinais da tour ün exaimpel da las duonnas chi vaivan demonstrà aint pels ons 1950 giò la Bassa, sun ils puncts culminants da la battosta democratica.

Quistas acziuns illas medias socialas sun absurdas. Cha'ls

antenats hajan regalà e cun quai eir donnagà l'En ed il Spöl e cha uossa segua ün'ulteriura gronda part da la natüra... Para cha'ls adversaris hajan invlidà cha bler'infrastructura turistica per giasts ed indigens es gnüda finanziada culs raps dals fits d'aua e cha quistas investiziuns han eir pisserà per bleras plazzas da lavur. Bain ridicul da crajer uossa cha'ls giasts nu gnian plü in vacanza, schi vain prodüt in avegnir energia solara in Engiadina Bassa per 20 000 chasadas. Ed eir schi vain adüna darcho lodà il grond ingaschamaint cultural in Engiadina Bassa, esa da savair cha eir quel vain finanzia per gronda part our dal fondo dals «tschinch pertschient» dals fits d'aua dals cumüns concessionaris. Perquai esa ün pa ipocrit da predgiar aua e baiver vin.

Avant ün on es gnüda eletta üna nouva suprastanza cumünala a Scuol e blers s'han giavüscharts ün ingaschamaint innovativ e bunas ideas per l'avegnir. Schi muossain tantüna eir in quista situaziun cha nus vain fiduzcha illa nouva suprastanza e cha nus sustgnain lur ingaschamaint tanter oter eir illa strategia d'energia. Las vaschinas ed ils vaschins da Scuol han fat in gövgia passada il prüm pass. Las votantas ed ils votants da Scuol pon la fin d'eivna seguir quista strategia e metter duos jadas ün cler SCHI ill'urna per cha'ls responsabels possan seguir culs sclerimaints in detagl.

Nicola Bass da Scuol es redactor e substitut dal schefredactor pro la Posta Ladina/Engadiner Post. Quist editorial es eir stat publichà illa Posta Ladina dals 20 da settember 2023.